



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tiryimiyim@aolima




tir yimiyim

TAPAK 7

Adani aser Ambani yaritsü Tsüngremi Modi yok: Rahul Gandhi

PML-N tir inyaksü Nawaz Sharif shimogo



VOL. XXI ISSUE NO. 226 (ADOK 226) DIMAPUR RASEMNÜ (WEDNESDAY) MONUPII (MAY) 29, 2024 ₹ 5.00

U/R mesüra A/F number plates atema metetdaksür

Dimapur, May 28, 2024 (TYO): Nagaland Police-i U/R mesüra A/F number plates amshiba gari kiburtemi dang register asütsü metetdaksüogo.

Koda masüba timtem mesüra senchi nungi jembua alitsü atema gari kiburtemi pei pei Regional Transport Offices nung register asütsüla ta Nagaland Police-i ashi.

U/R mesüra A/F anishiba gari kiburtemi pei pei RTO nungi anguba certificate/receipt/document bener senzüsüla ta parnokisa ashi.

Iba ya Motor Vehicle Act alema lir anungji temerenshi alitsü. Ano külen ibala garitem ya ozüing alema mapa inyakdang amshir ta Nagaland Police-isa ashi.

DMC election atema metetdaksür

Dimapur, May 28, 2024 (TYO): Dimapur Municipal Council Municipality election atema June 7 nungi 11 tashi nung nomination papers agütsütsü osang metetdaksüogo.

Candidate tem mesüra parnok proposer temi anepdang 11:00 ako nungi nikongdang 3:00 tashi Returning Officer, DMC & Dimapur Deputy Commissioner W. Manpai Phom mesüra Assistant Returning Officer, DMC Vinekho Tetso ket nung nomination papers agütsütsü akok.

Iba sülen June 13, 2024 nü Returning Officer DMC, Deputy Commissioner's Office,

Dimapur nung nomination papers reprangtsü aser June 18, 2024 nikongdang 3:00 ako tashi nung nomination papers meyipa agitsü akok.

June 26, 2024 anepdang 7:30 ako nungi nikongdang 4:00 ako tashi polling asütsü ta Returning Officer, Dimapur Municipal Council Dimapur W. Manpai Phom-i sangdong ka nung metetdaksüogo.

Iba election ya Dimapur Municipal Council Municipality nung Ward No. 1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20, 21, 22 aser 23 member atema agitsü ta paisa ashi.

Nagaland University-i IIT-Guwahati den MoU agiogo

Dimapur, May 28, 2024 (Agencies): Nagaland University-i IIT-Guwahati den MoU ka nung sign sütepogo.

May 27, 2024 nü IIT-Guwahati nung Nagaland University vice chancellor Prof Jagadish K Patnaik aser IIT-Guwahati director Prof Devendra Jalihal nati MoU nung sign sütep.

Iba tenangzüktep ya

National Education Policy (NEP) 2020 nung lateta aliba ama agir kechiyong NEP ajanga India nung higher education tajungba akümtsü atema tesentaktep yanglutsü shia lir.

Iba MoU ya administrative & faculty support, internship, short-term training programmes aser infrastructure development atema lir.

Tanü Nagaland Page küm 25 ajunger

Dimapur, May 28, 2024 (TYO): Nagaland Page küm 25 ajungba tenüng nung Nagaland Chief Minister Neiphiu Rio-i anir telok balalai tenüngsang agütsüba metetdaksüogo.

May 29, 2024 nung Nagaland Page küm 25 ajunger aser iba atema Editor Mrs. Monalisa Changkija-i anir lar telok nem tenüngsang agütsür ta CM Rio-i ashi.

"Nagaland state nung fourth estate nung Nagaland Page ya tongshi ka lir aser tayongzükba aika ajuruaka iba tashi aruba ya takok tulu lir. Iba ya nenoki meranga inyakba aser bendanga agütsüba kuli lir" ta pai ashi.

Nagaland Page adokba nungi tenzüker tanü tashi ochi aser temeten atema inyaka arur aser maneni iba amai inyaka aotsü ayongzüker. Iba anogomong

nung Nagaland Page telok moatsür, ta CM Rio-isa ashi.

Dimapur Press Club (DPC) aser Mokokchung Press Club (MPC)-ia sangdong balala ajanga Nagaland Page nem tenüngsang agütsüogo.

Senior journalist aser poet Monalisa Changkija-i aniba teloki tayongzükba jenti ajuruaka osang sangdonga aruba atema tenüngsang agütsür aser maneni moatsür, ta DPC sangdong nung ashi.

Küm 25 tashi ochi milendong ka, lokti asoshi ola ka aser osang tejangja angudak ka ama aruba atema tenüngsang agütsür. Nenok editor Monalisa Changkija-i anir bendanga agüja inyakba ajanga osang prokshiba dang masü saka tazüngertem ajungmesogo aser asen loktiliba akangshio go ta MPC-i ashi.

Cyclone Remal ajanga Nagaland nung teraksa aika bentsür aruogo



Dimapur, May 28, 2024 (TYO): Cyclone Remal aser tzungluruwa mongpu ajanga Nagaland nunga kanga mejungi kongshio go aser tesem balala nung teraksa bener arutsüba den nisung takümtem sama.

May 25, 2024 aonung Mokokchung district kübok Chuchuyimlang nung yipru agi ki aika 9 tashi raksatsü. May 24, 2024 aonung Tuensang district kübok Noksen subdivision nunga ki 36 tashi raksatsü aser Zunheboto district kübok Awotsakili yimtsüng nunga ki ka raksa.

Meluri subdivision kübok Laruri yimtsüng nung arishi küm 7 tanur ka tzü nung arakset.

Külen, Wokha district nunga Doyang Dam nung nisung ana tzü nung samar bushitepdar.

Iba tatalokba atema NSDMA-i National Disaster Response Force (NDRF) telok ka search & rescue operations atema mapa lemzüktsüogo.

Nagaland nung tang mezüing atema under-water drone ka amshir aser NDRF, SDRF, DDMA Wokha o local volunteers-i maneni mapa inyakdar.

Phek district kübok Pfutsero nunga arishi küm 73 tain tambur ka atsü chirepdang asü. Iba tatalokba nung pa kinungtsü yirua lir. Phek district nunga Kikruma yimtsüng nung anentsüh aluba osang lir.

May 28, 2024 nü tzunglu kanga aruba ajanga Kiphire district nung kiojen aika raksatsüba osang angazüker.

NSDMA-i osangtem bendendar aser District Disaster Management keddangsurtem den sendaktepa aliba department tem kanga jeretpera alitsü metetdaksür ta Commissioner & Secretary to the Govt. of Nagaland Lhouchalie Viya, IAS-i sangdong ka nung ashi.

Cyclone Remal ajanga Nagaland nung taruba hopta tzunglu maneni arutsü. May 27 nungi May 29 tashi tesem aika nung mopung tesashi aontsü aser ibaji June ita tetenzük hopta tashi aontsü ta NSDMA-i metetdaksüogo.

Kumlong Ward nung Watsü aser ULB nung candidate-tem senden aka

Mokokchung, May/ Monupii 28 (TYO): Watsü Mungdang-i ayongzüka May 28 aonung Kumlong Ward Community Hall nung tang aruya aliba Urban Local Bodies(ULB) election dak rangloker Watsü Mungdang,Kumlong ward Watsü telen aser Candidate-tem senden ka menogo.

Mokokchung Municipal Council(MMC) kübok aliba Ward 18 nungi Ward 6(Alempang ward, Süngkomen ward, Penli ward,Marepkong ward,Kumlong ward aser Artang ward) ta nung Women Reservation agi ataa item ward-tem nung tetsürtem temeja tetoktepba lia tatokertemi tongti shilem agitsü.

Tang agitsü aliba ULB election nung Mokokchung nung ward 6 nung aliba nüburtem talisa watsü telen nung lenir aser watsülaritem ajuruua Watsü Mungdangi iba election nung tetsürtemi shilem tajung agitsü, talisa yim tashi amshia iba election nung metokteptsü, pur den atongsema otetba nübur meimba nübu shimtsüla, sobaliba nung tarak maket aser Tsüngrem tsübua pei asoshi masü saka nübur asoshi bilemba nübu shimtsüla ta asüba yimiyim bener Watsü Mungdangi ward 6 prong nung shisalemsaba sentong agia jajaogo aser tatemsa Kumlong ward nung taonung tembangogo.

Kumlong ward nungi ULB election nung tokteper adoka Mokokchung Municipal nung

Kumlong ward meyonga inyaker candidate 3 lir. Parase mi iba sentong nung ULB election nung toktepba indang telok dang metetdakja liasü.

Mezüngbuba nung candidate Sademkala Kichu ajanga lai la küm 20 tashi telok balala nung shilem agia arudang, nüburtem den teka amalitepa inyaka aoba ajanga terenlok mapatem inyakteter, anungji iba tangatetba nung ULB election nung tetsürtem asoshi aruba maongkaji agia Kumlong ward meyonger ka ama noktaka Kumlong aser Mokokchung asoshi inyaksü iba election nung tokteper ta ashi.

Laisa Kumlong nüburtemi la adokdaksüra sorkar sentong dak ajemdaker Kumlong yimden den angatetepa terenlok mapatem inyaka Kumlong nübur anitsü sarasadema atar ta ashi.

Tanabuba nung candidate Wapangnaro Pongen ajanga 33% Women reservation agi Mokokchung nung ward 6 nungi tetsür 6 adoka pei ward meyongtsü, alimai tetsürtemi koma inyaksüta repranga aliba mapang ka nung tetsür jenjang ajungketa sayutsü, tetsür tashi,sempet sayutsü temelungtetba nung ni ULB election nung noktakerta ashi.

Laisa development bener arutsüta menangzüker saka sorkar sentongtem dak ajemdaker Kumlong yimden den angatetepa Kumlong nübur,

Mokokchung nübur asoshi bendanga agüja inyaksü temelungtetba lirta lemsatöp.

Tasembuba nung candidate Arenmongla ajanga lai la ULB election nung candidate ka ama noktaka lemsatöp dang, Kumlong ward nung la soa inteter lia arudang ULB election nung Women Reservation arura noktaksüta bilema liasü, atangji nung women reservation amenoka ULB election agitsü sangdong nung la noktaksü asoshi shingia manong saka lai kümlong meimba agi kümlong ajungketa tejakleni aoba nung tongti shilem agitsü asoshi ULB election nung noktakerta ta ashi.

Iba sentong nung Kumlong Ward Chairman ajanga tayongzük den tajungshiba o jembi, Kumlong Watsü telen Tir Watsülenla ajanga tarur pela agizükba den metetpela mapang agi, sentong tenzüka Kümlong Baptist Arogo Tesayula ajanga sarasadem aser Watsü Mungdang Tatong Tir Wt. Asola keddangsuba nung iba sentong agiba den Taoba Watsü Mungdang Tongti Zülur Wt.Dr.Anungla Aier aser Taoba Watsü Mungdang Tir Wt.Supongla Lemtur ajanga taoba mapang ULB election dak sentakba nung Watsü Mungdangi inyaka aruba aser ajangshibatem lemsatöpba den tayongzüka olen lemsatöp aser tatem nung telok külemi sarasadema iba sentong tembang.

Artang Ward nungi ULB election-i inürtem den Watsü Mungdangi mensem aka



Artang Ward nung ULB election-i inürtem den Watsü Mungdang-i ayonga mensem ka Artang Community Hall nung amendang candidate-tem (mena alir) den Watsü Mungdang ketdangsürtem aser Artang Ward yimden tenzükertem külemi tangokba noksa nung angur. 28th May, 2024

Mokokchung, May 28 (TYO): Watsü Mungdangi ayonga Mokokchung Municipal kübok tetsürtem nem menden noklang shilem nung 33% shiteta yutsüba ward-tem nung election-i inür candidate-tem den mensem balala mena arudar. Kasa sentongji 28th May, 2024 nü Artang Ward nunga menogo.

Artang community hall nung iba mensem akadang Artang nungi candidate asem (3) – R. Asangla (Süngratsü), Bendangkokla (Ungma) aser Mapujungla (Longkhum) parnoki election-i aiba nükjiong den adokra maparen balala inyaksü kar lemsatepa liasü. Mokokchung Municipal kübok Artang ya Ward No. 4 lir aser ibai women reservation küboki aiter.

Sentong nung taoba Watsü Mungdang lenir, Wt. Süpongla Lemtur-i Nagaland nung aser Mokokchung nung 33% Women Reservation atema maparen koda inyaka aru, iba

indang otsü kar lanu asensortemi mamatoksü atema tongtibang tatalokbatem lemsatepa liasü. Laisa timtem tekangshi ajurubatemala kar shisem.

ULB dak sentakba nung election magiteti küm 20 jungnüa arur tanü iba election 33% Women Reservation dena asangsang agitettsüsa maangka bener aruba asoshi pelaba metetdaksü. Tetsürtem nem menden balaka shiteta yutsüba (reservation agütsüba)-ji amajok mekümdaksüi tajungtiba nung ochi shia, tasü itta aser timi inyaksü merangang, ta lai tayongzükba ka agütsü.

2011 küm ABAM-i koba "Clean Election" yimyim ayimokja lir, iba yimyim ayimoktsür külen election kar agiogo, saka tanü tashi iba yimyim mapa mekümteti arudar. Anungji, "nisung ka vote ka" inyakyim nung talisa tetsür nem menden mekazüktsüba ward-tem

nungbo ochi shia shilem agidaktsünür, ta laisa inyakdaksünüba olen ka metetdaksü.

Taküm ULB election ya Aotsür aser Naga tsürtem atema otsüsütsü ka asütsü. Nenok mapa ajanga Ao tsür wangshidaktsütsü, anungji, temelenshiji nenok dak nungi tenzüktsüsa ochi shia inyaksü taoba Watsü Mungdang lenir, Dr. Anungla Aier-ia mapang tatsüka agia tajungshi o lemsatepdang ashi.

Iba mensem nung Watsü Mungdang tir, Arenla Longkumer menden liasü. Artang Ward Chairman, T. Ati Mongro-i tayongzükba o tulu bener arua lemsatep. Taküm Mokokchung Municipal kübok tetsür nem mekazüktsüba mendenji ward trok (6) nung lir. Itemji; Ward No. 1 - Alempang, Ward No. 4 - Artang, Ward No. 7 - Kumlong, Ward No. 10 - Sungkomen, Ward No. 13 - Penli, Ward No. 16 - Marepkong.

District Disaster Management Authority Mon senden amen



May 28, 2024 nü Deputy Commissioner, Mon Conference Hall nung DDMA Mon quarterly sendenba noksa angur.

Dimapur, Monupii/May 28 (TYO): District Disaster Management Authority (DDMA) Mon indang quarterly senden May 28, 2024 nü Deputy Commissioner, Mon indang Conference Hall nung mena liasü.

Iba senden ya Deputy Commissioner & Chairman DDMA, Mon, Ajit Kumar Verma, IAS lenisüba kübok amen aser pai senden nung adenertem pela agizüka liasü.

Iba senden ya meyi aruba mapang district nung renemshia alitsü asoshi amenba lir.

Yimya agi meyi mapang lenmang nokdangba, chiyongtsü, mozü aser danga tongtipang osettsüset agi anüngba amala timtem ajurur,

anungji department ajak renema alitsüla, ta pai ajungshi. F&CS Department ajanga district nung tongtipang oset aliba indang osang agüka liasü aser PWD (R&B), PWD (N/H) NHIDCL aser BRO ajanga lenmang balala aser machine balala aliba indang osang agütsü.

Kasa senden nung Executive Engineer PWD (R/B) ajanga meyi mapang atema Task force ka kumteta lir ta metetdaksü aser parnoki lenmang müreka kilentzü aoba lenmangtem anepalur ta ashi.

District Hospital Mon indang ketdangsürtemi mozüki nung mozü aser nübu aliba indang osang agüja liasü. ADC Mon Hq, K

Temjennaro Longkumer-i Monsoon preparedness atema mürekmejua alitsü indang rateta ashi.

Tang tashi Mon jila nung lokti nübuttsük takok ngua inyakba mali, anungji ketdangsür temi pei office nung inyak tenzüktsüla, ta lai ashi.

Asenok ajaki shilem agitsüla, aser ketdangsür, NGOs, nübur temi shilem magira lokti nübuttsük ayongzükba nung tajangzük mali, ta ashi.

Mürekmejutsü aser jana indokba tesem junga anepalutsü atema nüburtem nem angatetdaksütsü aser nüburtem yimya melenshitsü kanga nüngdaker, ta laisa iba senden nung ashi.

Kohima nung Counting officials training agi

Dimapur, Monupii/May 28 (TYO): Micro Observers temi Election Commission of India (ECI) indang guidelines meteta alitsüla aser pei mapa inyakba nung kanga kumdangtsüla, ta Deputy Commissioner, Kohima, Kumar Ramnikant-i ashi.

May 28, 2024 nü Deputy Commissioner, Kohima indang Conference Hall nung Counting official training agidang, ketdangsürtem dang machine tem kanga junga reprangtsü aser item machine melapoki alimali jangjatsüla, ta DC Kohima ajanga ashi.

Ramnikant-i ketdangsürtem dang vote azüngba mapang team ka ama inyaksü aser unit ka ama alitsü ayongzüka liasü.

Vote azüngba mapang timtem kar danga adokra tekeratiba nung ketdangsür nemo sang agütsütsüla, ta pai ajungshia liasü.

Iba sülen 18th Lok Sabha Election 2024 atema vote azüngtsü shima aliba Counting officials nem Deputy Director, Labour Commissioner & District Level Master Trainer, Chubayanger-i training agüja liasü.

Mon Town Council election atema nomination asütsü sangdonger

Dimapur, Monupii/May 28 (TYO): Mon Town Council Municipality atema Ward No. 1,2,3,4,5,6,7,8,9,10 aser 11 nung election agitsü aser Ward No. 1,4,7 aser 10 ya tetsürtem asoshi wazüka lir, ta ADC & Returning Officer, Mon Town Council, K Temjennaro Longkumer-i sangdong ka nung metetdaksü.

Nomination papers ya candidate mesüra pa indang proposer ajanga Additional Deputy Commissioner Office Chamber, Deputy Commissioner's Office, Mon nung scrutiny asütsü. Candidature withdraw asüba osang ya candidate mesüra pa indang proposer mesüra pa indang election agent ajanga June 18, 2024 nikongdang tashinung tezüluba nung agütsütsüla, ta sangdong ajanga ashi.

Nomination paper indang forms ya tang shia aliba tesem nungi kasa mapang angutsü ta ashi.

Nomination paper tem ya June 13, 2024 nü Additional Deputy Commissioner Office Chamber, Deputy Commissioner's Office, Mon nung scrutiny asütsü.

Candidature withdraw asüba osang ya candidate mesüra pa indang proposer mesüra pa indang election agent ajanga June 18, 2024 nikongdang tashinung tezüluba nung agütsütsüla, ta sangdong ajanga ashi.

Election nung tetokteper lira, June 26, 2024 anepdang 7:00 ako nungi nikongdang 4:00 ako tashinung agitsü, ta sangdong ajangasa ashi.

Assam Rifles temi sentong balala ayongzük

Dimapur, Monupii/May 28 (TYO): Assam Rifles temi Tuensang district kübok arütsülen Nokhu yimtsüng nung alirtem nem angati medical aser dental camp ka May 27, 2024 nü ayongzüka liasü.

Iba sentong nung nüburtem nem tongtipang teyari agütsüba den tashidak balala nungi kumzüka alitsü mera agia liasü. Iba camp nung anasa aliba yimtsüngtem nungi nisung 47 arua temang anepalua liasü.

Assam Rifles temi iba ama mapa tajung inyakba atema nüburtemi pelaba lemsatepa liasü.

May 28, 2024 nü Assam Rifles temi Little Daffodils Higher Secondary School, Doyapur nung kaketshirtem asoshi "International Day of Action for Women's Health" indang awareness lecture ka agüja liasü.

Iba sentong nung school principal ajanga tayongzükba o jembiba sülen shilem agirtem tsüngta sensaksem agia liasü.

Iba sentong nung tetsürtem temang anema aser mürekmejua alitsü indang jembiba aser temang tashi ita aser anema alitsü atema saisapong nung shilem agitsü, tashi aittsü atema chiyongtsü tajung peria achitsü shisa lemsatepa liasü.

Kaketshirtem, talisa tetsürtem pei temang anepalutsü asoshi shisatsü agütsütsü nükjiong nung iba sentong ya ayongzük, kong

kaketshir nisung 70 aser tesayur pongu dena liasü.

Assam Rifles temi sentong tajung ayongzüka agiba atema school staff aser kaketshir temi pelaba lemsatepa liasü.

Maneni Government Primary School, Mishikito, Dimapur nung Assam Rifles temi May 27, 2024 nü Meri Life Amplification 2024 nung shilem ka ama "Sustainable Use of Resources" indang awareness lecture sentong ka ayongzüka liasü.

Iba sentong nung tzü kumzüka ayutsü, energy kumdanga agitsü, tzü-mopung menenba yimya mamshitsü, Red Light nung gari shibanga alitsü onüktem jembia liasü.

Ali rongsen kumdanga amshitsü kaketshir nem awareness agütsütsü nükjiong nung iba sentong ya ayongzüka liasü, kong kaketshir nisung 60 aser tesayur 13 dena liasü.

Kaketshirtem dang tarutsü nung nüburtem asoshi environmental ambassador akumtsü nükjiong nung "Sustainable Use of Resources" yimyatam amshitsü ajungshia liasü.

Iba sülen sensaksem mapang kaketshir temi tasüngdangba balala agütsüba Assam Rifles temi langzüa liasü.

Assam Rifles temi yimjung tesunep atema maparen balala inyakba atema school tesayur aser kaketshir temi pelaba lemsatepa liasü.



Late Pangerzülu (Akhoya) Pilar kum 25 abensa anogo (29.05.1999 - 29.05.2024)

Menungra Bilemteter

Temeim oba, oko aser obou, tanu nai onok toxtur orr kum 25 ajungba anogo nung onoki na bilemteta sarasadema amonger. Nu nem Tsungremi ken mejema atentsu sempet tulu agutsuba ajanga asen Arogo lokti sentong balala nung nai mejema atenba kentem to, onoki kakat kuma adoker na bilemeta asen Akhoya arogo aser yimer alidak tesemtem nung tena arudagi. Na mesuka nu semchir semnurtem rongnung kar danga ken mejema atenba sempet tajung alir adokdakjang ta onok tamang sarasadem. Takar Tsungremi nu nem moatsuba chirnur aser semchir semnurtem ajak tanu tashi arishia toktsu nung Tsungrem tenung asanger. Yimer yimsanger ajaki nai mejema toktsuba kentem atenba ajanga teti na menungra bilemteter.

- Temeim Chirnur, Semchirtem aser Kinungertem.

Adani aser Ambani yaritsutsungremi Modi yok: Rahul Gandhi

New Delhi, Monupii/May 28 (Agencies): Congress MP Rahul Gandhi-i ashiba agi, Ato Kilonser Narendra Modi ya industrialists, Gautam Adani aser Mukesh Ambani yaritsuta atema pa indang "parmatma-i (tsungrem)" yok. Modi-i interview ka nung pa tsungremi yok ta ashiba dak sendakba nung Gandhi-i iba olen ya lemsatapa liasiu.

UP kubok Deoria tesem nung rally ka nung omjembiba mapang Rahul Gandhi-i, Modi indang tsungremi pa aluymertem aser aayangertem yaritsuta atema meyok, ta ashi.

"Nisung ajak biological saka Narendra Modi bo biological masu. Pa pa indang tsungremi Ambani aser Adani yaritsuta atema yok, saka tsungremi pa aluymertem aser aayangertem yaritsuta atema meyok," ta Rahul

Gandhi-i ashi.

Gandhi-isa, PM-i "Modi wale parmatma" indang jembia arudar, ta ashiba ANI sangdong ka ajanga metetdaksu.

"Tsungremi pa yok asuba pai sensaker aser aluymertem yarila. Ya kechi amala tsungrem ka? Iba ya Narendra Modi indang tsungrem lir," ta pai shisem.

Kasa mapang nung Rahul Gandhi-i, pai Agnipath scheme shisar jana bendendak intoktsutsu ta tenangzuka aguja liasiu.

Pai ashiba agi, INDIA bloc sorkar kumtetra, sorkar mapa aser educational institution tem nung menden shilem 50 tashi dang mekazuka ayutsu zungre aliba agintsutsu.

Paisa, INDIA bloc-i linuk temzung ozung kumzuka ayutsu ta ashi.

Interview ka nung o jembiba

mapang PM Modi-i, pa dak "ability, tashi, temulung temerek aser tangar atsua arutsu sempet" keter yok, ta ashi.

"Kutsu takum ali tashi ni ni biologically aso ta bilema liasiu. La asuba sulen ku tajangshibatem rebrandngba mapang ni tsungremi yok ta jangja kumogo. Iba tashi ya tanga temang ka nungi masu. Iba ya tsungremi agutsuba. Ibayongji tsungremi ku nem ability, tashi, temulung temerek aser tangar atsua arutsu sempet agutsu. Ni tsungremi yokba hadir ka dang lir," ta PM Modi-i ashi.

Mongolbarnu, BJP-i yimsu asuba Madhya Pradesh stat kubok Dalit kibong ka anema jenjang agiba dak sendakba nung Gandhi-i X ajanga, Narendra Modi-i rule of law tembangdaksuogo, ta ashi.

Chhattisgarh nung Naxalites 15 puogo

Dantewada, Monupii/May 28 (Agencies): Chhattisgarh kubok Dantewada district nung IED ka apokba sulen tetsur tenet densema Naxalites 15 puogo, ta police-i Mongolbarnu metetdaksu. Deobarnu police tem meita aoba sentong ya ayongzuka agiba mapang iba IED ya pokdakja liasiu, saka shinga meyuru, ta police-isa metetdaksu.

Naxalites tem ya Geedam police station kubok Gumalnar yimtsung anasa pua liasiu. Deobarnu state police unit; District Reserve Guard (DRG) aser Bastar Fighters na iba yimtsung anasa meita aoba sentong ka nung shilem agia liasiu, ta Dantewada Deputy Superintendent of Police (DSP) Unnati Thakur-i osangbenertem dang ashi.

Police temi pua alirtem ya timba CPI (Maoist) indang frontal outfits nung inyaksangshia alirtem liasiu, ta laisa ashi.

Patrolling team-i Honibarnu Gumalnar aser

Mustalnar yimtsung anasa arem nung meita aoba sentong ya ayongzuka, aser Deobarnu nikongtsutsu 4:30 ako shi nung Naxalites temi security personnel tem dak rangloker improvised explosive device (IED) ka pokdaksu, ta DSP-isa ashi.

Iba lending nung sepaitem ka danga meyuru, ta lai shisem.

IED pokdaksuba sulen temulung melemi bilemba nisung kar iba tesem toktsur jena aotsu merang, ajistiaka sepaitemi parnok arishia ao aser parnok 15 pua liasiu, ta ketdangsir yagi metetdaksu.

Ken o ashishiba sulen, parnok ya sepaitem amaktsu atema arem nung atsuka aliba nguteta liasiu, ta Thakur-i ashi.

IED ka, electric wire, detonator, steel tiffin box ka, Maoist pamphlets aser literature, Maoist uniform aser anogoshia amshiba osettem ngutetogo, ta lai ashi.

Police-i pua aliba Naxalites tem okadaki anirogo aser parnok judicial custody nung yua lir.

BJP-i menden 200 dak tema makoktsu: Mallikarjun Kharge



Chandigarh, Monupii/May 28 (Agencies): Congress tir Mallikarjun Kharge-i, BJP-i menden 400 dak tema akoktsu ta ashiba ya tamagitsuta ashiba den parnoki Lok Sabha election nung menden 200 dak tema dena makoktsu, ta shisem.

Amritsar nung osangbenertem den sensaksemba mapang Kharge-i ashiba agi, taoba election den medemdangra BJP pur menden tajemba kuma odar aser kasa mapang nung Congress aser INDIA bloc pur menden timba kumdar.

BJP-i aniba National Democratic Alliance-i, takum Lok Sabha election nung parnoki menden 400 dak tema akoktsu ta shia arudar.

Iba dak sendakba nung telangzuba agutsuba mapang Kharge-i, "nenok menden tajemba akumer aser onok menden timba akumer. Menden 400 dak tema akoktsubajibo amatokang iba ya tamagitsuta. Parnoki menden 200 dak tema dena makoktsu," ta Kharge-i ashi.

Kharge-i ashiba agi, Tamil Nadu, Kerala aser Telangana nung BJP ya mali den khasa aser Karnataka nunga tashi mait.

"Nenok Maharashtra nung tashi mait aser West Bengal o Odisha na nung raradar. Nenoki kodaser menden 400 dak tema akoktsu?" ta pai asungdang.

Union Home Minister Amit Shah-i, election nung Congress pur tamakok anguba sulen Kharge mapa maka akumtsu ta ashiba dak sendakba nung Kharge-i, "ni mapa inyaktsu atema politics nung adenba masu. Ni nuburtem tenzuktsu atema tanur asudang nungi politics nung aden, aser PM Modi arishi kum den kasa jungnua arudar," ta ashi.

"Pai June 4 sulen pa mapa atema bilemtsula," ta Kharge-i shisem.

Congress tekolakbai, aluymertem sentsuh taitok agutsutsu aser chiyongtsu balala atema minimum support price dak sendakba nung temzung ozung kubok guarantee agutsutsu nangzuka nenshia metetdaksu.

Paisa, unemployment aser Agnipath scheme dak sendakba nung BJP-i aniba Centre sorkar aija liasiu.

Central sorkar kubok mapa tazung lakh 30 lir aser INDIA bloc-i sorkar kumtetba sulen item mapa ajak sungdaksutsu, ta pai ashi.

India-i Papua New Guinea nem USD million 1 agutsutsu

New Delhi, Monupii/May 28 (Agencies): India-i Mongolbarnu sangdong ka ajanga, Papua New Guinea nem teyari YSD million 1 agutsutsu ta sangdongogo, kong anentsuh tulu ka aluba sulen nisung 2000 shi takum anembangogo aser teraksatsuba tulu adokdaksuogo.

Anentsuh aluba tesem kar nungbo ali suklep 30 dak tema nongdena aliba aser hadir tapet maliba ajanga takum alirtem kumzuktus aser tasumang agitettsu atema tetsukdaksu adoka arudar.

"Tembar ka aser India-Pacific Islands Cooperation (FIPIC) nung partner ka ama aser Papua New Guinea nungertem den onok nokdaka

aliba temaitsu India sorkari relief atema teyari, rehabilitation aser kiojen aser lenmang amala yanglushitsu asoshi USD million 1 agutsutsu," ta external affairs ministry-i sangdong ka ajanga metetdaksu.

Ato Kilonser Narendra Modi-i asikhu lemsatepba den timtem tekangshi ajangshia aoba mapang Papua New Guinea nem takokba tashi teyari agutsutsu atema India renema aliba lemsatepogo.

"Papua New Guinea anentsuh Indong nung takum samaba aser teraksatsuba tulu bener arutsuba angashia temulung koremer. Lendong agi kongshir aliba kibongtem den asikhu lemsateper aser yirur alirtem takaratiba nung taneptsu

angutsu sarasademja atar. Takokba tashi teyari agutsutsu atema India renema lir," ta pai X nung post ka ajanga lemsatep.

Papua New Guinea nung lendong balala atalokba mapang India-i teyari aguja arudar. 2018 kum menoknok anokba aser 2019 aser 2023 kum volcano pokteta adokba mapanga India-i teyari agutsuogo.

Anentsuh malu tsungda iba tesem nung nisung 3,800 shi liya liasiu, aser Papua New Guinea indang National Disaster Centre-i ashiba agi, nisung 2000 dak tema takum remogo.

Australia sorkaria Papua New Guinea nem tang jongdak nungdaktem atema amshitsu asoshi USD million 2.5 teyari agutsutsu sangdongogo.



Indira Gandhi International Airport, New Delhi nung Varanasi-i aotsu aliba IndiGo tayimtsu ka nung bomb tokja aliba indang osang ka angazukba sulen passenger tem emergency door ajanga aninba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, MAY (MONUPII) 29, 2024

Israel kija tongpang

Israel o Palestine na raraba otsü ya asenok asoshi tasen masü saka tang Israel nungertemi Palestine tesem külen Gaza amakba otsü yabo tang tatalokdak tongpang raraba indang lir. Atangji, Israel ta asüdang, asenok Khristantemi balaka, asen lima amai bilemer aser Israel nungertemjia asen kinungertem amai bilemer. Ibaji asenok Khristantem otsü ya Abraham, Isak aser Yakob nungertem den sendaktepba ajanga lir. Aji oda, asenoki külemba Tsüngrem ya Abraham, Isak aser Yakob nungertemi külemba kasa Tsüngrema ta asenoki amanger. Iba kasa Tsüngrem dakji Israel nunger shirnok dang Yihuda nunger ta ajar, parnokia tanü tashi amanger. Ajisüaka, Yihuda nungertemi Yisu Khrista ya Tsüngrem chir alimai aru ta mamanger, anungji Yihuda nunger mesüra Israel nungertem ya Khristan masü aser Israel lima yaa Khristan lima masü. Ibaji kodang asenoki angatetdir asenoki Laishiba tali bushinütsü aser Yisu Khrista aser tebu Tsüngrem indang tali metetnüsü. Aji oda, Yisu dakbo mamanger saka Abraham, Isak aser Yakob Tsüngrem dakbo amanger aser iba tashi nung alima külen ser Israel kijai takok ngua rarartetba tamang, tashi aser tetezü ya angatetsü asenok asoshibo tamakoktsü. Atangji, tang Israel nungertemi Gaza amakba ya Israel o Palestine na tongpang masü mesüra Khristan o Muslim na tongpanga masü, saka Gaza nung yimsüsüba telok Hamas purtemi yaküm küm October 7 nü ajungbena ka dang Israel nungertem kenten benjong ka lia alidang artsü adena iagi amakba ajanga Israel nungertemi mang ayangtsü tenzükba tang tashi manentet rarar. Israel aser Palestine na tsüngda rara anentsü atema alima kintemi shidangba o kaji kin ana prongla yimten nüchiso anguba kin kaka asütsüla. Tetezüji, Israel nungertemi Palestine nungertem lia aliba linük ajungaji parnok nem agütsüba tenangzükba lima ama mebilemsüla aser Palestine nungertemia alijak nung Israel nunger li tilaka mali amatobo mebilemsüla. Aji oda, Israel o Palestine na tsüngda kodang kati ka akümtsübutepa tangar kintemi ashiba o ji angaa telemtetba kati arudir, idangjiang parnok ajak tesünep nung alitsü. Iba tangatetba nung tang ya United Nations lokti senden nunga Israel amaji Palestine lima yaa yimten nüchiso akaba lima balaka akümtsü temeten agütsüogo. Kasaji, European Union nung aliba kintemia Palestine lima yimten balaka kümteta aotsübaji tim ta kanga akanga nokdakba mapang lir aser ano külen US-i dena Israel nungertemi Gaza nung tai maketba nebo tetsür tanurtem dena asütsüsa amakba mapa aitsüogo. Tang yabo Palestine lima agi ana kümer West Bank ya Palestinian Authority-i yimsü asür aser idakji Israel nungertemia sepaitembo yoka anüker, saka Gaza yabo Hamas teloki yimsü asür. Hamas telok ya tekong temerang aser tasüa metsübu Israel lima mali küma samatsütsü merangertem lir. Iba jagi Israel o Palestine na ken o ya mamener. Aji oda, rarabo parnoki mena saka timtem aser takoksa ajuruba purtembo Hamas yimsüsüba kübok Gaza nung alir nübortem lir. Iba rara nung Israel nungertema meyirijang ka aser noklang anashibo sür südi saka Gaza nung alir Hamas nübortembo meyirijang semer trok dak tali süogo aser pei ki maka küma poksatsür talidak maka senzür jenti kümogo. Hamas telok majungyonga, parnok anema raradang Israel nungertemi tai maketba Palestine nungertem nem tali timtem aser takoksa agütsüba agi, repranga dangbo melitet, UN nung alima kintemi Israel mapaji aitsüogo. Ajisüaka, Israel nungertem asoshibo rara manen, parnok nukjidong aser temulungtetbaji alima nung Hamas malitsüla. Atangji, Hamas telok ama ali tashi yimten o lenjem kati marutetsü, ibaji angateta UN teloki Israel nungertemi taochi maka inyakba mapatem aitsüba ama, Hamas teloki meimchir tapayu mali inyakba kiralongraba mapatem yaa kenyongi mali küma anendaktsüra, Israel aser Palestine na dang masü saka alima ajak sünepa akümtsü.

OLEMSABANG

Nüjiso bushidang atepzüng nung nüburr tsüngda tesendaktep meraksatsüla

~ L. Kika Pongener.

(Yashi adok nungi...)

Aji oda, tanüa nüburr tulu-tila ajaki linük tenzükerti arok atema timtema linük tenzükertem ta kanga akümtsübur. Anungji linük tenzükertem-ia nüburrtem dang kanga meima benshitsüla. Aji oda, linük tenzükertemi nüburr dang meimtsü melena, timtem-ang tali agütsüra, nüjiso bushir asü mesura nüburr timtemdaktsütsü bushir ta nüburrtem mangmangtsü...!!! Anungji nüburrtemi linük tenzükertem nukjidong tajungji angatetsüsa tenzüktsüla. Aji oda, asen lima sunepa yimjung nung alitsü atema nüjiso bushir, saka asen lima nung nüburr tsüngda yimjung tesunep melira, nüjiso tetezüji kechi asütsü...??? Anungji linük tenzükerti o nüburr tsüngda tesendaktep meraksatsü kanga kümdangtsüla.

Temalen shisemba ama, asen Naga nunger kibongtem rongsenkettsüng jenjang (Economic condition) asadanga reprangdangra, noklang shilem nung tir (80%) sensakertem, tanü poksung aayanga alirtem, aser itasen tila agi kibong/taküm mesua alirtem asütsü. Noklang nung shilem metsü (20%) dang tulur aser taka-taitertem asütsü. Shia aruba ama, tanü asen Naga nunger nüjiso bushir telok 'Faction' aika küma lemsaba agi saru-saji tali aküm, kechiyong telok ajunga jagi küsa saru sarutsüsa akümer. Aser saru-saji onsaraba agi 80% sensaker kibongtemi timtem marem ola adoker. Ibajagi, nüburrtemi nüjiso bushirtem telok ka aser saru molok ka dang asütsüla ta akhanger. Sorkar tenzükertem danga itasen nungi percentage (%) meshir, ajioda, tulurtem atemabo balaka timtem mali, saka tilartem-bo kanga tim-atemer. Ano Contractor & Supplier-tem daka, linük tenzükertemi dang masü, sorkar-ia VIP Percentage, Departmental Percentage, Party Fund Percentage ta....iba amalaji katizükra, (Deduction),...Aser ano linük tenzükertem-ia Contractor & Supplier-tem dangji 'Tax' (%) meshira...Iba amala jagi asen lima nung terenlok (Developments) mapa inyakba nunga tetsüdaktsü ajurutsü aser mapa-a junga meinyaktetsü. Anungji State sorkar nungi tenzükerti, linük tenzükertem aser telok-tentet balalai iba ama temelen saru-saruba ajunga ya anentsüla. Ano iba dak alaka, asen lima nung arogotemi anir telok-tentet zünger-mezüngma kati Fund raise atema Calendar, Lottery etc. ayokba aser Donation saruba item ajak yagi nüburrtem nem timtem talila agütsür, anungji item saru-saji ajak ya sorkar temzüng ka agi anendaktsütsüla.

Tanü asen Naga lima tia jungjunga reprangdangra, kanga teratatsü jenjang ka nung nokdaka lir. Joko nüburrtemi nüjiso ya shitakba asangsang (Reality) nung angutsü asü mangutsü (?)...ta rata-matar...!!! Tip külen Eastern Nagaland-puri 'State' balaka akhanger, tip külen 'Opposition-less Govt.' yanglur temetongshitsür maliba agi küshi-küshi inyakteper, tip külen linük tenzükertem telok (Faction) tali-tali lemsar, tip külen saru-saji tali saruba agi osettsüset nung jenjang tupet atur...Ibajagi nüburrtem timtem marem asateper. Aji oda, iba jenjang nung ya-sa maneni ora, nüburr o linük tenzükerti na tsüngda nung temeim mekongga akümtsü aser tesendaktep raksatsü, aser nüburr tsüngda nung rara adoktsü kanga tsüboseta bilemer. Ano aji dang masü, nüjiso ya tatempang telemtetba kati maruteti mapang talangka atsülanga ora...Nagaland State tilaka yagi...Eastern Nagaland, Central Nagaland, Southern Nagaland...ta lemsa-a aotsü kanga tsüboseta bilemer. Anungji, India nunger nungi nüjiso mangu tsüngda nung asen atepzüng nung, nüburr o linük tenzükerti tsüngda rara madoktsüsa, linük tenzükerti aser nutsüng-nüburr ajaki tensa tia kanga kümdanga azüoka alitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Somali nung tamanger ka kinunger temi züka merenshi

Kismayo, Monupii/May 28 (Agencies): Somali nung tamanger ka dak par kinunger Muslim nung temi züka merenshiba ajanga pa temang kanga mejungi yiru aser pa kinungtsü aser par tanur pongu den pilatsüsa akum.

Arishi küm 40 tain Mohammad Abdul ya March 20 nü Khrista dangi meyipba sülen May 5 nü Somali indang Lower Jubba region kübok rongnendak Kismayo yimti tezülen züka merenshi, ta osang ajanga ashir.

Abdul ya medical clinic ka nung temang anepalua aliba mapang kinunger temi pa kinungtsü aser tanurtem anir ao ta ashir.

"Abdul ya yiruba zübu anepaluba mapang Muslim nungertem par kidangi ao aser par ki raksatsü tenzük aser pa kinungtsü den tanur pongu ya parnok den ao," ta osang ajanga ashi.

"Pa kinungtsü pa dang Muslim nung temi pa bushir ta ashi aser parnok bushia marutsüla ta ashi."

Abdul ya iba lendong nung tekolak nunga zübu tuluksa liasü aser teka raksa. Pa takum kumzüktsü mechi Somalia nungsa yimti danga kati ao.

Taküm March ita bendang lima nung alir Somali pastor arua par ki semdangba sülen Abdul-i Khrista agizük. Pai par kibong aser Khristan lenir den

külemi nikongdang shia sarasadema Laishiba angazüktsü tenzük.

Abdul'er tanurtem rongnung arishi küm pongu tanuri kidanger dang parnok sentong agiba indang ashiba sülen mepetmesü ya tenzük Abdul kinungtsüi pastor dang pa takum kumzüktsü mechi ainshitsü ashi.

Pa April 11 nü ainshiba sülen Abdul'er kinunger Muslim nung temi pa amokmerena text messages yokba osang pastor dangi aru.

"Nikongdang shia na Yisu tenüng nung sarasademba aser ochimashi agi sünga aliba kaket zünga aser Quran, Allah-i Muhammad dangi yokba temeshi kaket mazünga onoki meteta lir," ta text message ka nung shia liasü.

"Nai yimya tamajung amshia külemkejaba manenra nü takum lendong nung lir."

Tetsübo agi pa kinungtsü sarasademba nung shilem magi, ajisüaka Abdul-i maneni Tsüngrem dak pa tamang tera ayang.

"Onok sarasademba indang ozü tanur anati dangar tanurtem den lemsatop. May 2 nü ozü jabaso tanubosang jepa aru aser ni Lai azünga aser sarasademba indang ashiba sülen dangari pa dak azük ta ashi," ta Abdul-i ashi.

May 5 nikongdang 7:30 ako meta Abdul'er Muslim nung

kinungertem par kidangi aruba sülen tensa mejungi akum.

"Parnoki kü kolak agitsü ta ayimtena liasü. Parnok ozü kidangi nungboka aiter Islam sendokba aser yimsü tamajung amangba indang asüngdang tenzük. Kü kinungtsü aser tanurtem kanga aoksar liasü," ta Abdul-i iba tatalokba biletmeta ashi.

Abdul dak par kinunger kati kotari agi atsüing. "Tanurtem ola tulu adoka jepet aser kü dak teka sangshirtem mangmanga akum. Iba sülen ni azü agi yimbanger kishilen nungi jena ao aser kilometre 5 shi pilar kinunger ka kidang mejang," ta ashi.

Pai metettepa alirtem dang par kibong asoshi sarasademtsütsü ajungshia liasü.

Somalia indang constitution nung Islam ya state religion ta sangdonga lir aser danga yimsü prokshiba nokdang aser ozüing ya sharia (Islamic law) den lirumedema yanglua lir.

Northern Kenya nunga 2011 nungi tenzük Al Qaeda den sendaktepa aliba Al Shabaab teloki iba ozüing ya kanga sashia amshir aser non-local nisung aika tepseta lir.

Open Doors' ajanga alima nung Khristanpur alitsü atema linük tamajungtiba 50 asadangba 2024 World Watch List nung Somalia ya jenjang tanabuba nung lir.

ANO GO ABEN TSÜNGREM DEN

Tanela anir arurtem

"Aniseta alir dang o agi ... koda jembitsü ...
temeli agüja lir." (Isa. 50: 4a)

Khristan mapa nung tesademtiba mapa wadangji tanela anir aruba mapa ya lir. Koba Khristani aji inyaksü makoker, koba meta tesütep masür, aser kechi mapang mesademer?

Kar tanela anir arutettsü asoshi asenok dangi tangarji melamela arutetba asütsüla. Tanela anir arur ka menürema tejak adentsüla. Pai osang tajung bener aor masü na? Tanelatem asoshi khuret akabaji pai tejak mekümer mesayutsüla, saka anemsü masütsüla. "Onük tajung ka agi kü mulungjang moshia lir. Chuba atema ni kechi ken mejemer; Kü temeli kara kara-a zülur kolem ama lir" (T. Ken 45:1). Ibai tanela anir aruba noksa ka lir.

Tanela anir aruba mapaji azünga alidang inyakba mapa ka masü. Ibai mapang ajak nung kuli asütsüba mapa ka lir (2 Tim 4:2). Aluyimer ama tanela anir arurtemi metsü proker aluruwa asoshi aremzüka atatsüla (Yakob 5:7). Tanela anir arur nisung kaji ango purtem ama zütsük tzü nung ondaksür aremzüka atatsüla. Taremzük aser tenendakji tanela anir arur jakla asütsüla. Merangdangba aika nung takok mangutsüa akok, saka mejashitsüla. Arogo nung Sannükeri sentepi arurtem dang masü, marur aser samaba santemji kümdanga bushitsüla. Pai aritepa metoktsütsüla. Nisung tsüngdang kechi tamakoktsü aji Tsüngrem tsüngdangbo takoktsü lir.

Pakistan: Muslim nungeri yirutsüsang Khristan ka temang tajungba lir

Lahore, Monupii/May 28 (Agencies): Pakistan kübok Sargodha tesem nung tamangba yimsü mezüngmeshi ta tiazü nung tai tonglokja May 25 nü Muslim nunger telok kati züka merenshisang Khristanpur ka temang tajungba lir ta osang ajanga ashir.

Muslim nunger longkak aiter telok kati Sargodha yimti kübok Mujahid Colony nung arishi küm 74 tain Nazeer Masih Gill dak azük aser par indang ki aser tsüngsem yangluba factory rongdoktsü, kong pai kaket tamajung rongdoka aliba mapang mosque loudspeaker nungi nüburtem adenshitsü osang sangdonga liasü, ta kinunger kati ashi.

"Gill ya tekolak surgery agi aser pa temang tang tajungba lir. Par kibong kumzükta lir aser security mechi sorkar indang guesthouse ka nung yua lir. Tensa junga akumba sülen parnok ki kidangi meyipa otettsü," ta Sargodha Urban Police Station nungi Inspector Shahid Iqbal-i Morning Star News dang ashi.

Gill-i par kima yimtung nung

kaket tamajung rongdok aser ki telungi ai aser iba mapang nisung kari mi nung Quran copy ka mereploksü, ta par kinunger Irfan Gill-i ashi.

Iba sülen kidanger Muslim nunger kati pai Quran shisar arong ta tai tongloktsü aser yangji aliba Muslim nunger temi pa dak züka merenshitsü ajungmeso, ta pai ashi.

Tamangba yimsü mezüngmeshi ta tai tongloktsüba sülen Mujahid Colony nung rongrongshirong tulu adoker anogo ka lir May 26 nü Sargodha nung tensa tajungba akum, kong police temi temulung melemi nisung 44 tenüng nung ken o benoka aliba nungi Muslim nunger 26 pua lir. Kasa maparen nung nisung 300 nungi 400 tsüngtai ki o jen raksatsü ta tai tonglokja lir.

Ki o jen raksatsürtem anema ken o benokba ya anti-terrorism laws aser Pakistan Penal Code indang section balala kübok lir aser yangji nisung tepsettsü merangba, sorkar ketdangsür pei mapa inyakba nung tenokdangba agütsüba, ketdangsür

merenshiba aser ki samatsütsü mesüra nisung tepsettsü mesüra yirutsütsü tebilemba nung mi aser tapoktsü oset amshia mapa tamajung inyakba dena lir, ta Iqbal-i ashi.

Emergency call nung mezüng telangzüba agütsürtem rongnung Iqbal ya liasü, aser pai ashiba agi police aser Sargodha Peace Committee züngsem temi iba nisung telok ka ya süngjemdaksütsü merag saka parnok Nazeer Gill indang tsüngsem yangluba factory nung mi senloktsü aser anasa aliba ki nungi pai kidangi aitsü merang.

"Nisung telok ka yagi Gill'er kimalen electricity meters aser outdoor AC unit tem raksatsü aser mi senloktsü," ta pai ashi.

"Onoki mi jangrua aliba ki nungi Gill ya kumzük, saka onoki pa kimai anir adokli nisung telok ka yagi onok dak long agi aon tenzük aser onok kabu nungi pa atsüzüker ao. Iba sülen parnok pa dak süng-long agi atep aser onok daka teka sangshi. Onoki pa kumzükta mozüki kati anir aotsü merangba mapang police ter shi yirua liasü," ta Inspector

Iqbal-i ashi.

Police temi CCTV footage aser social media nung prokshia aliba video tem repranger mapa tamajung inyakerem apu tenzük, ta pai ashi.

"Pei sasa ozüing amshitsü merangertem onoki aputsü aser tapet ozüing agi merenshitsü. Nisung shinga linük ozüing alema metoktsütsü," ta Iqbal-i ashi.

Gill dak züka merenshiba mapang police temi mesoitte ta aitsüba pai magizük aser külem sepaitem yirua aliba ajanga onoki pa kumzüktsü merangba sayur ta ashi.

"Iba tensa nung Muslim nunger yangji alirtem aser putir temi shilem tajung agiba yong Gill'er kibong ya kumzükta, aji mesüra parnok ya lendong tulu ajuru lila," ta pai ashi.

Nazeer Gill anema tamangba yimsü mezüngmeshiba ken o ka benoka lir, saka police temi iba ken o indang-indanga aser kanga junga bushisüngdang, taser ozüing sülen anidaksü, ta Iqbal-i ashi.

Ano Sargodha police

ketdangsür kati Nazeer Gill'er kibong ya shidanga dena kensü-osü menaa mali aser tamangba yimsü tsütsü mangatettep adokba nunga shilem agia mali ta ashi.

"Nisung kari Gill aser par kibong dak tenük yokba nungi iba lendong ya atalok südi, aser onoki ochi bushiteta aibelener nem tapet temerenshi agütsütsü temulungtetba nung lir," ta pai ashi.

Ketdangsür temi anogo tenet atema longkak aitiba nokdanga ozüing benokba sülen Khristanpur timba aliba Sargodha District aser tekülem kidang police 1,000 dak tema yoka liasü.

Linük anemba tashi ajanga linük telungjem raksatsütsü meranger aser yamala tasa tamajung nungi linük aser nüburtem jenbua alitsüla, ta Islamic putir tejangja aser Central Moon Sighting Committee nung mendenpuba Maulana Abdul Khabeer Azad aser Islamic scholars temi Deobarnü Sargodha commissioner indang office nungi osangbener dang shia liasü.

AO OSHI ANGAZÜKDAK: TANÜ ANGAZÜKTSÜBA OJANG



Süok

(v) yong aser süngküm agi tapok atepba (mending works with bamboo materials)

* Molok aser pakti tapok nung yong süoka ateper.

Süoki

(adj) aroka bilem (think seriously)

* Saytsüngiri ashiba o ajaki süoki ia bilema agir.

OLONG PAITEP # 6801

Grid for OLONG PAITEP # 6801 with numbers 1-15 in various positions.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenu'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6800 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Anjo.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Sүjak, 10. Aonung, 11. Dokan, 13. Tinu.

NAI-A YA METETTER MA



Tamil Nadu kübok Mayiladuthurai nung Abhinaya Natya Palli ta ser sentong ka agidang state 28 prong indang tsüngsang balala khen nung tsüngsanga liasü. Iba sentong nung tsüngsanger 45-i ghonda 2 nung tsüngsang balala ia sayu aser International Pride World Record-i iba ya world record ka züngokogo.

Iba sentong ya 'Unity in Diversity' omen nung ajemdaker agi aser Uttar Pradesh indang Kathak aser Odisha indang Odissi tsüngsangtem dak alaka Mayiladuthurai Abhinaya Dance School kaketshirtemi dang tanünga state tem tsüngsang ia sayu.

Mizoram CM Lalduhoma-i Aizawl nung lendong atalokdak semdang



Aizawl, May 28, 2024

(Agencies): Mizoram Chief Minister Lalduhoma-i Aizawl nung Cyclone Remal ajanga lendong atalokba tesem ana semdang.

Home Minister aser Disaster Management & Rehabilitation Minister K. Sapdanga den Minister, MLA aser ketdangsürtemi CM Lalduhoma meina senzü.

Lalduhoma-i lendong balala

nung taküm samaba kibongtem den asükhü lemsatep. Paise relief & rehabilitation maparen nung shilem agiba search and rescue operation teams, volunteers aser teyariteper ajak dang pelaba metetdaksü.

Chief Minister Lalduhoma-i tamasa Aizawl District Disaster Operation Centre (DC Conference Hall) semdanga liasü.

Idakji ketdangsürtemi pa den

osang lemsatep aser pai district disaster management ketdangsürtem dang pei pei district indang osang tejangja bendentsü tetuyuba agütsü.

CM Lalduhoma-i Disaster Mitigation Fund nungi Rs. 15 crore lemsütsüba osang metetdaksü. Paise tasür kibong shia nem Rs 4 lakh teyari agütsütsü ashi.

Chief Minister Lalduhoma-i nisung teimtiba asüba Melthum yimtsüng semdang. Pai semdangba mapang tasümgang 12 nguteta liasü.

Chief Minister aser Home Minister nati tasür 8 kinunger shia nem Rs. 2 lakh agütsü. Tanünga Rs. 2 lakh ji osangtem bendenba sülen agütsütsü ta tenati ashi.

Chief Minister-isa Melthum Branch YMA nem search & rescue expenses atema Rs. 50,000 agütsü.

Melthum semdangba sülen Chief Minister Lalduhoma-i Kanan Locality Cemetery nung anentsüh aludak semdanga liasü.

Iba lendong nung yariteptsü atema pai Rs. 50,000 agütsü.

Cyclone Remal: Assam district kar nung shisaliok rejutem shibangtsü

Guwahati, May 28, 2024

(Agencies): Cyclone Remal ajanga tsüngsang mejungi akümba agi Assam Chief Minister Himanta Biswa Sarma-i May 29, 2024 nü district aika nung shisaliok reju ajak shibangtsü metetdaksüogo.

Iba ya Nagaon, Hojai, West Karbi Anglong, Karbi Anglong, Golaghat, Dima Hasao, Cachar, Hailakandi aser Karimganj district tem nung asütsü.

May 28 nü Cyclone Remal Northeast tonga aru aser iba ajanga Assam district aika nung tzunglu kanga aruba den mopung tesashi aon.

Assam nung anogo ishika anü kanga tsüka apoba sülen mokonga akümba ajanga

nübertem timtemer aser kaketshir o staff kümzüka ayutsü atema CM Sarma-i shisaliok rejutem shibangtsü tetuyuba agütsüogo.

Mongulbarnü Assam nung cyclone Remal ajanga lendong balala nung nisung 2 asü aser 17 yiru.

Lower Subansiri Hydroelectric Power project nung anentsüh aludang Putul Gogoi ta ser nisung ka anenset.

Ano, arishi küm 17 tain kaketshir Kausik Bordoloi Amphitashir sündong laoa akoset. Pa ya auto-rickshaw ka nung mener aodang iba lendong ajuru aser iba tatalokba nung nisung pezü yiru.

Sonitpur district kübok Dhekiajuli nunga sündong ka

school bus nung laodang kaketshir 12 tashi yiru.

Chief Minister Himanta Biswa Sarma said the inclement weather is expected to continue.

"Ni ketdangsürtem dang lendongtsüdong atalokdang mapang shitak nung yariteptsü tuyuogo. Rongdak nungdak melira kimai maotsüla" ta Chief Minister Himanta Biswa Sarma-i metetdaksü.

India Meteorological Department (IMD)-i Assam ajungalen tzunglu kanga arutsü metetdaksüogo. Iba ajanga Guwahati, Jorhat, Tezpur, Morigaon, Dhubri, Goalpara, South Salmara, Barpeta, Cachar aser Karimganj district tem nung ferry services anenogo.

Shillong nung section 144 benoktsü

Shillong, May 28, 2024 (Agencies):

June 4 nü Shillong nung Lok Sabha elections atema votes azüngdang CrPC Section 144 benoktsü tetuyuba agütsüba ajanga political party temi ashishiteper.

Ketdangsürtemi law & order tebilemstü aser traffic ketdangsütsü atema iba ozüng agütsür ta ashir saka nisung kari iba ya 'democratic rights' anema lir ta aitsür.

"Onoki benjungtepba anema menoktaker saka counting centre nungi pei pei tesemi yimdong süa senzüdang law & order tebilemstü adoktsü akok aser iba jagi Section 144 benoktsü" ta East Khasi Hills Deputy Commissioner and Returning Officer, SC Sadhu-i Mongulbarnü ashi.

"Votes counting anogo ya working day ka lir aser iba jagi Shillong tiyongtsü nung lokti adenshiba ajanga traffic timtem ajurutsü. Iba tebilemstü ya Assembly elections nunga ajuruogo" ta DC Sadhu-isa ashi.

Voice of the People Party (VPP) aser Hynniewtrep Integrated Territorial Organization (HITO) ajanga District Administration aitsüogo.

District Administration-i tashiyim amshir aser sensotemi election maparen nung shilem agitsü temeten magütsür ta VPP-i ashir. Külen, HITO-i iba lemtet ya kanga tim masü aser mapang meshitak nung agütsür ta aitsür.

North Eastern Development Finance Corporation Ltd. Regd. Office: NEDFI House, G.S. Road, Dispur, Guwahati - 781006

Appendix-IV, Rule 8 (1) ALI-KIMONG AGIBA SANGDONGER. Securitization and Reconstruction of Financial Assets and Enforcement of Security Interest [Act, 2002 (54 of 2002) kübok North Eastern Development Finance Corporation Ltd (NEDFI) indang Authorized Officer ka ama aser Security Interest (Enforcement) Rules, 2002 indang section 13(12) read with [Rule 3] kübok tashi agüja aliba amshia M/s Echahaba Tea growers Cooperative Society Limited, Registered office: - Merangkong, 18th Mile, Village - Tuli, PIN-798618, District - Mokokchung, Nagaland indang sen apur/mortgagor/guarantor dang 25.01.2024 tashinung temenoktsü aliba sen 3,39,33,365/- (Rupees Three Crores Thirty Nine Lakhs Thirty Three Thousand Three Hundred Sixty Five Only) den iba anogo nungi sen tetemlok aser dang charges tem anogo 60 tsüngta menokang ta Demand Notice ka 25.01.2024 nü agütsü.

EU züngsemtemi Ukraine nem military teyari agütsütsü jenjang agir

Brussels, Monupii/May 28 (Agencies): Ukraine nem military teyari agütsütsü atema sensaksemstü asoshi European Union defence minister tem Mongolbarnü senden ka menogo.

Hungary-i tenokdangba agütsür aliba mapang ka nung EU nung züngoksema aliba linük aikati Ukraine nem teyari talila agütsütsü atema inyaktepdar. Hungary ya pro-Russian linük ka lir aser parnoki Ukraine nem teyari magütsüdahtsüi nokdanga lir.

Russia-i asendenshir Ukraine amakba mapang Kyiv nem tang teyari agütsütsü kanga nungdaka kümogo aser yamaji Ukraine-ia parnok den sendaktepa aliba linüktem dang teyari meshia arudar.

Ukraine tir Volodymyr Zelenskyy, teyari meshia tang Spain, Belgium aser Portugal semdangba mapang ka lir. Linüktemi teyari agütsütsü pa nem tenangzükba agütsüogo.

Belgium Foreign Minister Hadja Lahbib-i Mongolbarnü

ashiba agi, Brussels-i Ukraine nem F-16 fighter jets 30 agütsütsü aser mezüngbuba shilem taküm küm agütsütsü sentong lir, ta Belga news agency-i metetdaksü.

Linük ana tsüingda security dak sendakba nung tenangzüktepba yanglur aliba nung shilem ka ama tayimtsütem agütsütsü. Iba tenangzüktepba kübok Belgium-i euro million 977 alang military teyari agütsütsü nangzükter lir.

"Ukraine nem takaratiba nung asenoki prangbong injang aser hadir tajung agütsü nungdang parnoki tsükchir nokdangtetsü," ta Belgium Ato Kilonser Alexander De Croo-i ashi.

Kasa mapang nung Zelenskyy-i Hombarnü Spain dena tenangzüktepba ka yangluogo aser Madrid-i Kyiv nem air defence missiles talila agütsütsü.

Dutch Defence Minister Kajsja Ollongren-i Mongolbarnü sangdong ka ajanga, Netherlands-i Ukraine nem

Patriot air defence system indang parts tem agütsütsü ta metetdaksüogo. Dutch sorkarisa, complete system ka assemble asütsü asoshi parts yoktsü atema tanga linüktem den sensaksemdar, ta lai ashi.


Russia-i missile aser drone tem amshia Ukraine kübok tesem balala amakba mapang Kyiv-i air defence systems talila yoktsü atema mepeshia arudar.

Ajisüaka Hungary sorkari tenokdangba agütsütsü ajanga euro billion 6.5 alang teyari agütsütsü atema benoker aliba bangdaka lir.

Iba bloc nung züngsemtem dak veto asütsü tashi lir aser Ukraine defence akangshitsütsü atema benokba fund tem Hungary-i nokdanga arudar.

Budapest-i iba tenokdangba agütsütsü ajanga EU lenirtem mepelar, kechiyong iba ajanga Ukraine dangi hadir balala yokba atema central EU fund nung züngsemtem nem reimburse sütsütsü aliba nokdangter.

PML-N tir inyaktsü Nawaz Sharif shimogo



Islamabad, Monupii/May 28 (Agencies): Taoba Pakistan Ato Kilonser Nawaz Sharif küm trok sülen Mongolbarnü PML-N tir kümogo. Tir mapa asoshi pa den tetokteper Shinga maliasü.

Küm trok tejakdang Panama Papers ken o nung Supreme Court-i pai aitsüba sülen Sharif-i party tir mapa tokja liasü.

PML-N general council senden nung o jembiba mapang Nawaz-i, pa party tir akümba atema masü saka Saqib Nisar-i telemtetba agiba jana bendendak intoka toktsüba atema pelatepang ta ashi.

"Nawaz teti atema disqualify sütsüogo ta ashirtem dangi call süang. Tanü Nawaz nenok jakdang nokdaka lir," ta pai ashi.

Nawaz-isa, mepetmesü adoker aliba mapang party maneni tejakdangi anir aoba atema party züngsemtem aser pa tenu nem tenüngsang agütsü liasü. Paise, tashi aikati pa tenu aser PML-N den pa tesendaktep raksatsütsü merangogo, saka Ato Kilonser Shehbaz Sharif-i maneni masetshi nokdakogo, ta ashi.

PML-N tiri ashiba agi, küm Ishika tejakdang Nawaz agintsü atema pa tenu nem Ato Kilonser mapa agütsü saka tenui iba mapa magizük.

Nawaz-isa, Maryam Nawaz aser Hamza Shehbaz na nema tenüngsang agütsü. Tenata tepuodaki aiba densema timtem tekangshi aika ajangshiogo, ta ashi.

Kasa senden nung, party tir mapa maneni abentsü shimba asoshi Shehbaz-i teti nem tenüngsang agütsü liasü.

Pa nem nongloktsüba khuret tanü Nawaz nem meyipa agütsür, ta pai ashi.

Shehbaz-i ashiba agi, shirnoki ashiokeja Nawaz takoktem aser pai linük asoshi inyakba lutsütsü merangogo, parnok tanübo maksü nung lir aser tetibo ochi obendang nguogo.

2018 küm chief justice Mian Saqib Nisar-i aniba Supreme Court bench kati Constitution kübok Articles 62 aser 63 nung shia aliba ama disqualify sür aliba nisung kati political party ka tekolak mapa mebenetetsü ta shia obendang agütsüba sülen Nazaw-i party tir mapa toktsütsüsa aküm.



Gaza, May 28 : Gaza Strip south tsütsü Rafah yimti nungi May 28, 2024 nü mokozü adokba noksa nung angur. Mongolbarnü Israel army tem Rafah yimti tiyongi aita Palestine telungpur den khatap ta osangtem ajanga ashi.

European Union linüktemi Palestine linük agizükba sangdong

Madrid, Monupii/May 28 (Agencies): Middle East nung tesunep alitsü atema lenmangji Palestine linük ka amenokba ajanga dang alitsü, ta Spain Ato Kilonser Pedro Sanchez-i ashi aser Norway aser Ireland den külemi par linükia Palestine ya linük ka ama agizükba sangdong.

Spain-i Palestine ya linük ka ama agizüktsü sentong lir ta taoba mapang sangdonga aliba atema Mongolbarnü vote magitepdang Sanchez-i iba o ya ashi. Norway-ia Palestine ya linük ka ama agizükogo aser Ireland-ia kasaji inyakogo.

Cabinet-i Palestine linük ka agizüktsü asoshi tongtipang telemtetba ka agiogo aser yangji nükjidong ka dang lir: Israel aser Palestine nunger yimjung atema, ta Spain sorkar indang odongtar Pilar Alegria-i sangdong.

Spain ato kilonseri iba mera ya "historical justice" indang lir

ta ashi. "Yimjung alitsü atema lenmangji Palestine nunger linük ka amenoka Israel linük den külemi alitsüba ya dang lir," ta pai ashi.

"Palestine linük ya West Bank aser Gaza den corridor kati sendaktepa East Jerusalem ya yimtiba ama asütsüla."

Telok ajaki memulungtep tashi Madrid-i pre-1967 borders temelenshi kecha magizüktsü, ta pai ashi. Occupied West Bank, East Jerusalem aser Gaza Strip ya iba territory nung shilem ka liasü, saka Israel-i 1967 küm Arab-Israel War nung rakzük.

Spain, Ireland, Malta aser Slovenia linük lenirtemi Gaza nung rara atemtsü atema shilem tajung agiba ama Palestine ya linük ka ama agizüktsü asadanger ta March ita shia liasü.

Norway-i Palestine ya linük ka ama agizükba mapang

Foreign Minister Espen Barth Eide-i sangdong ka nung, "Küm 30 dak tema Norway ya Palestine linük ka kumdaksütsü asoshi ajang-ajanga nokdaka aru. Tanü Norway-i Palestine ya linük ka ama agizükdang, ibai Norway aser Palestine tsüingta tesendaktep nung alizüing ka lir," ta ashi.

Dublin nung Irish parliament kima Palestine nunger nisan atsüketer mapang tatsüka lir Ireland indang cabinet-i Palestine ya linük ka ama agizüka liasü.

"Ibai tongtipang mapang ka lir aser 'two-state solution' takum ayutsü aser teimla ayuba nung yaritsü atema ner linükia mapa inyaktetsü ta alima dang iba yagi sayur," ta Ireland Ato Kilonser Simon Harris-i ashi.

Malta aser Slovenia linük temia kasa mera agitsü ta shiogo saka tang masü. Harris-i Israel Ato Kilonser

Benjamin Netanyahu dang alimai ashiba angatsü aser Gaza nung meimchir takum samatsüba anentsü ajangshia liasü.

Ajisüaka item osang sangdongba ajanga Israel ain ang adoker aser Gaza nung maneni raraba atema European Union nung linük kar tsüingta mangatettep adokba tali tuluba akumer.

Israel Foreign Minister Israel Katz-i Spain Ato Kilonser Sanchez ya Jewish nunger samatsütsü ajangmesoba nung külemi inyaker ta aitsü.

Katz-i social media sapang X nung Spanish Second Deputy Prime Minister Yolanda Diaz külen aser Iran Supreme Leader Ayatollah Ali Khamenei aser Hamas tekolakba Yahya Sinwar nunger külen sür medemdanga liasü. Yolanda Diaz-i ayong nungi tzüym tashi Palestine shinga kübok malitsü

ayongzüka liasü.

Spain, Ireland aser Norway linük temi Palestine ya linük ka ama agizüktsü sentong aliba taoba hopta sangdong aser iba yongji Israel-i linük asem nungi par ambassador tem anizükter ao.

Palestine ya linük ka ama alima nung linük 144-i agizüka lir.

European Union nung züngsem 27 aliba nungi Sweden, Cyprus, Hungary, the Czech Republic, Poland, Slovakia, Romania aser Bulgaria linük temi Palestine ya linük ka ama agizüka lir.

United Kingdom aser Australia-ia kasaji inyaktsü asadanger ta shia lir, aser France-i tang mapang metemtsü ta ashir aser Germany ya Israel indang tembar tajung United States den lungjemer nokdaker aser jembishinü ajanga dang 'two-state solution' nung takok angutsü ta nenshia ashir.

Kevin De Bruyne lenisüba nung Belgium team EURO 2024 asayatsü



Monupii/May 28, 2024 (Agencies): Kevin De Bruyne lenisüba nung Belgium team EURO 2024 nung asayatsü, ajisüaka Belgium aser Real Madrid keeper Thibaut Courtois bo Belgium indang provisional squad nung züngoksema mali.

2018 küm captain mapa magütsüba atema Courtois aser Belgium manager Domenico Tedesco na mangatetep adoka liasü aser Tedesco-i March ita Euro atema Courtois meshitsü ta shir liasü.

Imla aliba ama Manchester City nungi asayar Kevin De

Bruyne aser Jeremy Doku na team nung züngoksemogo.

De Bruyne, shiba 2023-24 season tetenzüklen City nung asayaba mapang Achilles yirua liasü, pa season tesadang kabo masayateti liasü.

Ajisüaka pai meyipa arur taoba mapang asayaba ama kanga junga asaya tenzüka PL nung asaya 18 nung pai assist 10 sütsü aser City puri Premier League pezübuba akokba nung teyari agüja liasü.

Tang tashi nung Belgium-i asayar 25 sangdonger lir aser iba tetezü lanurtem asayartem atema team nung züngoksemtsü asoshi ano

maongka ka lir.

Belgium pur taoba Euro asayamung nung quarter-final nung aser 2022 FIFA World Cup nung group stage nung tsükba sülen taküm iba asayamung nung tajungba asayatetsü imla atadar.

Euro 2024 atema Belgium team:


Goalkeepers: Matz Sels (Nottingham Forest), Koen Casteels (Wolfsburg), Thomas Kaminski (Luton).

Defenders: Wout Faes (Leicester), Timothy Castagne (Fulham), Arthur Theate (Rennes), Jan Vertonghen (Anderlecht), Axel Witsel (Atletico Madrid), Zeno Debast (Anderlecht), Thomas Meunier (Trabzonspor), Maxim De Cuyper (Club Brugge)

Midfielders: Aster Vranckx (Wolfsburg), Youri Tielemans (Aston Villa), Orel Mangala (Lyon), Kevin De Bruyne (Manchester City), Arthur Vermeeren (Atletico Madrid), Amadou Onana (Everton)

Forwards: Romelu Lukaku (Roma), Charles De Ketelaere (Atalanta), Jeremy Doku (Manchester City), Lois Openda (Leipzig), Leandro Trossard (Arsenal), Johan Bakayoko (PSV Eindhoven), Dodi Lukebakio (Sevilla), Yannick Carrasco (Al-Shabab).

Küm 9 sülen Anthony Martial-i Mnchester United toktsüogo



Monupii/May 28, 2024 (Agencies): France nunger forward Anthony Martial-i Hombarnü sangdong ka ajanga pai Manchester United toktsüba metetdaksüogo. Pai küm teku sülen United toktsür.

Instagram ajanga pai iba club kanga saklokba aser pa dang ajungba atema kanga pelaba lemsatepa liasü. "Kanga

temulung raksa tanü nenok dang salem ashitsü zülur. Küm teku jangradem asayaba sülen ni kü indang career nung jenjang tasen ka agitsü atema mapang tongogo," ta pai ashi.

Arishi küm 28 tain Martial ya 2015 küm Monaco nungi pound million 36 yong Old Trafford-i aru. Pai kanga junga asayatsü imla liasü saka imlaba

ama masayatet. Pa groin surgery agiba ajanga taoba küm December ita nungi masayai arur dang club toktsütsü telemtetba agiba sangdongogo.

Manchester United nungi asayaba mapang club-i FA Cup, League Cup, aser Europa League akokba nung pai teyari agüja liasü. Ajisüaka tia maka pai Premier League mesüra Champions League ka danga mekokteti liasü.

Pa club tenüng nungi 317 ben asayaogo aser iba mapang tetoktepba ajak nung pai goal 90 idakja liasü.

"Manchester United ya kü mulung nung teti alitsü. Iba club ya kü indang career nung kanga tongtibang aser nenok matsüngdang asayatsü atema maongka tajung agütsüogo," ta Martial-i ashi.

Lemluwa pa den tenangzüktepba yanglur aliba tembangba sülen pai club toktsütsü. Maneni pai, "ni tajangshiba tasen ka atema club toktsür, ni teti Red Devil ka asütsü aser ni maneni club indang result tem sülen anidaksü," ta ashi.

French Open: Iga Swiatek, Coco Gauff tanabuba Round-i iogo

Monupii/May 28, 2024 (Agencies): Tetsürtem rongnung world number one tennis asayar Swiatek-i, Hombarnü French Open tetsür kija asaya mezüngbuba round nung France tsür qualifier Leolia Jeanjean 6-1, 6-2 agi ayong ayonga kokogo.

Poland tsürta ya tanabuba round nung Bodhbarnü Japan tsür Naomi Osaka den asayatsü.

"Ni meyipa arur asayatetba atema pelar. Ni kanga junga asayar ama bilemer, anungji takokba tashi talangba asayatsü imla atadar," ta Swiatek-i ashi.

Arishi küm 22 tan Poland tsürta ya Justine Henin sülen Roland Garros asemben atonga akokba mezüngbuba asayar akümtsü nükjidong lir. Lai iba asayamung kokra Serena Williams sülen küm ka nung Madrid, Rome aser French Opens akokba asayar tanabula

akümtsü. Tebur kija asaya nung Stefanos Tsitsipas-i 7-6 (9/7), 6-4, 6-1 agi Hungary nunger asayar Marton Fucsovics madak takok nguogo.

Kasa mapang nung tetsürtem rongnung third seed asayar Coco Gauff shibai US Open tesüsabuba koker lir, lai Russia tsür Julia Avdeeva 6-1, 6-1 agi ayong ayonga koka tanabuba round-i iogo.

Arishi küm 20 tain Coco ya tanabuba round nung Slovenia tsür qualifier Tamara Zidansek den asayatsü.

Maneni tetsür kija asaya nung taoba mapang Roland Garros runner-up aser Wimbledon tesüsabuba koker alila Marketa Vondrousova-i Spain tsür Rebeka Masarova straight sets nung kokogo.

Tunisia tsür Ons Jabeur-ia, US tsür Sachia Vickery ayong ayonga koka tanabuba round tongtetogo.

World Racketlon Championship: Chaufla-i anir India team asayatsü



Monupii/May 28, 2024 (Agencies): Rotterdam nung July 13 nungi August 4 nü tashi asayatsü aliba World Racketlon Championship nung shilem agitsü atema Mongolbarnü India team sangdongogo.

Team nung asayar trok lir aser parnok ya Vikramaditya Chaufla (captain) lenisüba nung asayatsü.

Racketlon ya combination sport ka lir, kong asayartem racket agi asayaba saya pezü; table tennis, badminton, tennis aser squash nung asayatsü nüngdaker.

Chaufla ya taoba mapang badminton asayar ka lir aser pa taoba World Championships ana nung India racketlon squad nung densema liasü. 2022 küm Rotterdam nung asayaba silver medal ka ngua liasü.

Maneni squad nung Nihit

Kumar Singh, Karan Taneja, Prashant Sen Nikhil Mansukhani aser Nayna Taneja nunger densema lir. Team nung Taneja kija tetsür asayar lir. Racketlon India Sports Association-i iba asayamung atema team ya Mongolbarnü sangdonga liasü.

"Ni World Championship nung tasembenbuba asayaba mapang team anir asayatsü ya maongka tulu. Racketlon ya India nung kanga kara renloka aoba asaya ka lir, aser World Championship nung junga asayatetra iba ajanga asaya indang tangazükba tali agütsütsü. Onoki nükjidongji linük atema medal kabosa ngutsütsü atema lir," ta Chaufla-i ashi, shiba Udaipur nungi lir.

K K Cheema, shiba Racketlon India Sports Association tir lir, pa team manager asütsü.

BILEMDANGANG
"Alirongsen agi taküm malizüktettsü."